

Xi³ ma³jao²-ni³ xon⁴xi³
pa²stro⁴Pedro
qui³squi³-le⁴nca³ts²i³

Pedro si¹ti²nta³

1 An³ nia¹³ Simón Pedro, cho⁴nta³-le⁴ c²oa⁴ pa²stro⁴-le⁴ Jesucristo. Ti²cji³-no³ jon² xi³ to⁴nco¹son² ma³cjain¹-no³ jo³-s²in² ma³cjain¹-na³jin⁴ nca³ jin⁴-jin⁴. Xi³ ma³cjain¹-na¹ n²ion¹ chji¹-le⁴. C²oa⁴-s²in² qui³ts²ai²-na¹ xi³ to⁴t²a³ts²e⁴ cjoa⁴qui²xi⁴-le⁴ Jesucristo xi³ Ni³na¹-na¹ c²oa⁴ xi³ tsa³c²a³sje³ntjai²-na¹. **2** Ca²ta³s²e³-sa³no³ cjoa⁴nta³, ca²ta³njen³nch²an¹jin³-sa³ ni⁴ma⁴-no³, nca³ ña³qui³ nta³ yao³ Ni³na¹ cao⁴ Jesús Nai³-na¹.

C²oa⁴coan⁴ cjoan³²jo³ cjoan³ Ni³na¹

3 Je² nca³n²ion¹-le⁴ Ni³na¹ qui³tsjoa³-na¹ nca³yi³je³ xi³ ma³chjen¹-na¹ t²a³ts²e⁴ cjoa⁴vi³jna³chon³, c²oa⁴ xi³ t²a³ts²e⁴ nca³ nta³ ya³xcoan¹ nca³ je². C²oa⁴-s²in² qui³tsjoa³-na¹ nca³ tsa³ya³² je² xi³ qui³nchja⁴-na¹ to⁴t²a³ts²e⁴ cjoa⁴je³ya³-le⁴ cao⁴ nca³n²ion¹-le⁴. **4** To⁴t²a³ts²e⁴ coi³ cjoa⁴-ve⁴ tsa³c²ai²-ni³na¹ xi³ qui³ni²s²e³nqui³-na¹ xi³ cjai¹nca³ nta³ tjin¹, xi³ cjai¹nca³ tse³ tjin¹, jme¹-ni³ nca³ c²oa⁴-ti⁴s²in² tjoe¹-si¹ni³no³ nca³ c²oa⁴coan⁴ cjoaon³ jo³ cjoan³ Ni³na¹, nca⁴ tsa³qui³ncha³xin²-lao⁴³ je² cjoa⁴ xi³ tgio¹ i⁴ son³nte³, xi³ si¹cji³tson¹-na¹, xi³ ts²e⁴ cjoa⁴chi⁴nca⁴. **5** C²oa⁴-ti⁴ jon² n²ion¹ ti⁴sin³-lao⁴³ nca³yi³je³ je² cjoa⁴-vi⁴. Xi³ ma³cjain¹-no³

ca²ta³s⁷e³-le⁴ nca³n⁷ion¹. Je² nca³n⁷ion¹-no³
 ca²ta³s⁷e³-le⁴ cjoa⁴chji⁴ne⁴. ⁶ Je² cjoa⁴chji⁴ne⁴-
 no³ ca²ta³s⁷e³-le⁴ cjoa⁴nt⁷e¹. Je² cjoa⁴nt⁷e¹-no³
 ca²ta³s⁷e³-le⁴ cjoa⁴tse³jta³. Je² cjoa⁴tse³jta³-no³
 ca²ta³s⁷e³-le⁴ cjoa⁴xcon¹ta³con² t⁷a³ts⁷e⁴ Ni³na¹. ⁷ Je²
 cjoa⁴xcon¹ta³con²-no³ t⁷a³ts⁷e⁴ Ni³na¹ ca²ta³s⁷e³-le⁴
 cjoa⁴tjao²cha³ t⁷a³ts⁷e⁴ nts⁷ao³. Je² cjoa⁴tjao²cha³
 t⁷a³ts⁷e⁴ nts⁷ao³ ca²ta³s⁷e³-le⁴ cjoa⁴tjao²cha³ t⁷a³ts⁷e⁴
 nca³ts⁷i³. ⁸ Tsa² tjin¹-no³ je² cjoa⁴-vi⁴, tsa²
 ma³ncjin²ya³jin³ ni⁴ma⁴-no³ je² cjoa⁴-vi⁴, li²coi³
 tsjоa¹nte³-no³ nca³ coi⁴yo³ts⁷ao²³, nca³ ni⁴jme³-
 jin² xi³ s⁷iaon⁴. C²oa⁴-s⁷in² coi⁴ma³son²cao⁴3 je²
 xi³ ma³cho⁴ya³-no³ t⁷a³ts⁷e⁴ je² Nai³-na¹ Jesucristo.
⁹ To⁴nca³ je² xi³ tsin²-le⁴ je² cjoa⁴-vi⁴, xca⁴ ni¹,
 a³li²coi³ nta³ ma³tsen³-le⁴. Qui³si³cha³jin³ nca³
 je³coan³tsje³ ja⁴t⁷a³ts⁷e⁴ cjoa⁴ts⁷en⁴ xi³ co²tse³
 qui³s⁷e³-le⁴. ¹⁰ Coi³ cjoa⁴ nti¹nts⁷e³, nqui²sa⁴ nta³
 ti⁴xi¹ti¹ya³-lao⁴ yao³-no³ nca³ coa⁴co²son²tsaon³
 nca³ Ni³na¹ qui³nchja⁴-no³ c²oa⁴ tsa³cja³a¹jin³-
 no³. Tsa² c²oa⁴s⁷iaon⁴ je² cjoa⁴-vi⁴, ni⁴to⁴c²ia³-
 jin² tsaon⁴nquio³. ¹¹ C²oa⁴-s⁷in² cjai¹nca³ to⁴nta³
 c²oai⁴nte³-no³ c²ia⁴ nca³ coi⁴tja¹s⁷en³jion³ cao⁴
 cjoa⁴je³ya³ je² cjoa⁴te¹xo³ma³ntsjai²-le⁴ Jesucristo
 xi³ Nai³-na¹ c²oa⁴ xi³ tsa³c²a³sje³ntjai²-na¹.

Coi³ cjoa⁴ nca³ qui³squi³ Pedro

¹² Coi³ cjoa⁴ li²coi³ coa²te⁴jna³jyoa¹³ nca³
 si³cja³ai³tsjen³ ntsjai²-no³ je² cjoa⁴-vi⁴, nta³ tsa²
 je³yao³, nta³ tsa² je³ti³yo³n⁷ion¹jin³-lao⁴ je²
 cjoa⁴qui²xi⁴ xi³ je³tjin¹-no³. ¹³ Tjen⁴ nca³ ti²jna⁴jin³-
 sa³ je² yao³-na⁴, c²oa⁴xian³ nca³ nta³ tjin¹ nca³

c⁷oa⁴-s⁷in² c⁷oe³ne²³-no³, nca³ si³cja^{3?}ai³tsjen³-no³.
14 Je^{3?}ve³ nca³ nti⁴ton⁴ coi⁴tjo³xin²-na³ yao³-na⁴, jo³-
 s⁷in² tsa³ca³co¹-na³ je² Nai³-na¹ Jesucristo. **15** C⁷oa⁴-
 ti⁴ cjai¹ n⁷ion¹ c⁷oe³ne²³-le⁴ yao³-na⁴, jme¹-ni³ nca³
 cjoa^{4?}ai¹tsjen³-si¹ni³no³ nca³ntsjai² je² cjoa⁴-vi⁴ c⁷ia⁴
 nca³ cjoe⁴ coi³ya¹³ an³.

Je² xi³tsa³ve³-ni³ xcon⁴ cjoa⁴je³ya³-le⁴ Cristo

16 C⁷ia⁴ nca³ tsa³c⁷in²ya³-lai²⁴jin⁴ xi³ t⁷a³ts⁷e⁴
 nca³n⁷ion¹-le⁴ Jesucristo Nai³-na¹, c⁷oa⁴ jo³-
 s⁷in² nca³ cjoa^{4?}ai¹, li²coi³ qui³ni²sin³-lai⁴jin⁴ xi³
 to⁴cuento[?]mi², xi³ to⁴jin⁴tsa³c⁷e²ntai³⁴-jin⁴, to⁴nca³
 je² xcoin³⁴-jin⁴ c⁷oa⁴-s⁷in² tsa³ve³ je² cjoa⁴je³ya³-
 le⁴. **17** Ni³na¹ N⁷ai³-na¹ tsa³c⁷a³sje³nta³ c⁷oa⁴
 ts⁷a³sje³je³ya³ Jesucristo c⁷ia⁴ nca³ tsa³cja¹cao⁴-
 ni³ jta⁴ xi³ ja^{3?}ai³-ni³ ya⁴ jñña³ nca³ je³ya³ chon³
 ya⁴ nc⁷a³jmi³ xi³ qui³tso²: Je²-vi⁴ nti¹-na⁴ xi³
 cjai¹nca³ nta³ tjaо²que⁴, jo³ nta³ qui³s⁷e³coan³
 xi³ t⁷a³ts⁷e⁴. **18** C⁷oa⁴-ti⁴ jin⁴-jin⁴ qui³no²⁷ya²-
 lai⁴jin⁴ jta⁴ xi³ nc⁷a³jmi³ ja^{3?}ai³-ni³, c⁷ia⁴ nca³
 ya⁴ to⁴jnco³ tsa³qui³yo³coai⁴-jin⁴ ya⁴ ni³nto³tsje³-
 ve⁴. **19** C⁷oa⁴-s⁷in² nqui²sa⁴ n⁷ion¹ ti¹jna³qui²xi⁴-
 na³jin⁴ je² en¹ xi³ to⁴nqui³-ni³ qui³s⁷e³ya³ta³coan³².
 Cjai¹nca³ nta³ n⁷iaon²³ tsa² si⁴sion³ je² en¹-ve⁴,
 jo³-ni³ tsa² jnco³ ya¹l[?]i¹ xi³ si¹i³sen³ nte³ jñña³
 nca³ njion², jo³ sa^{3?}nta³ nca³ s⁷e⁴sen¹, c⁷oa⁴
 sa^{3?}nta³ nca³ si^{42?}i³sen³jin³-le⁴ ni⁴ma⁴-no³ jo³-ni³
 ni³ñño³tse³. **20** Ti¹tjon² ca²ta³ma³cho⁴ya³-no³ je²-
 vi⁴ nca³ ni⁴jnco³-jin² en¹ xi³ qui³s⁷e³ya³ta³con²,
 xi³ ts⁷e⁴ xon⁴ Escritura, xi³ to⁴xquia⁴ cho⁴ta⁴
 tsa³c⁷e¹nta³. **21** Nca⁴ ni⁴čhjin³ co²tse³ ja^{3?}ai³ je² en¹

xi³ tsa³ca¹ya³con³-na¹, li²coi³-jin² nca³ c⁷oa⁴-s⁷in² coan³me³-le⁴ cho⁴ta⁴son³nte³. To⁴sa³ qui³nchja⁴ya³ je² cho⁴ta⁴ xi³ tsje³ tjio¹ ja⁴t⁷a³ts⁷e⁴ Ni³na¹, jo³-s⁷in² qui³si³i³sen³jin³ cjoa⁴fa³ai³tsjen³-le⁴ je² Espíritu Santo.

2

Cho⁴ta⁴nti³so³ xi³ qui³nchja⁴ya³ t⁷a³ts⁷e⁴ Ni³na¹, c⁷oa⁴ cho⁴ta⁴nti³so³ xi³va³co¹ya³

1 C⁷oa⁴-ti⁴ ya⁴ na⁴xi⁴na³nta¹-ve⁴ tsa³ca³tio² cho⁴ta⁴nti³so³ xi³ qui³tso² nca³ qui³nchja⁴ya³ t⁷a³ts⁷e⁴ Ni³na¹, jo³-s⁷in² s⁷e⁴jin³-no³ cho⁴ta⁴nti³so³ xi³ coa⁴co²ya³. Je² sca⁴ni²jin³ma³-no³ cjoa⁴ xi³ si⁴qui³tson¹-no³, c⁷oa⁴li²coi³coan⁴cjain¹-le⁴t⁷a³ts⁷e⁴ je² Nai³-na¹ xi³ tsa³c⁷e¹chji¹ntjai² t⁷a³ts⁷e⁴. C⁷oa⁴-s⁷in² coa⁴sjai³-le⁴ yao³-le⁴ xi³ nti⁴ton⁴ cha⁴jin³.
2 Ncjin² xi³ coai⁴tjen⁴nqui³-le⁴ ntia⁴ xi³ ch²ao³ tjin¹. Xi³ to⁴t⁷a³ts⁷e⁴ coi⁴nchja⁴aon³-ni³le⁴ ntia⁴ xi³ qui²xi⁴. 3 Cao⁴ cjoa⁴xin²ta³con² si⁴qui³njen³-ni³ xi³ to⁴t⁷a³tsaon⁴, nca³ c⁷oa⁴na⁴cha⁴-no³ cao⁴ en¹ xi³ tsi² tsa² coi³ c⁷oa⁴tjin¹. Sa³nta³ co²tse³ ti¹jna³co³ya³ cjoa⁴ñ⁷ain³-le⁴. Li²coi³ coan⁴tse³-le⁴, li²coi³ v⁷e²jna³fe² xi³ cha⁴jin³. 4 Ni³na¹ li²coi³ qui³si³cha³t⁷a³-le⁴ je² a²ncje⁴ xi³tsa³jnqui³je¹, to⁴ya⁴ qui³sca³ni¹ jña³ l⁷i¹ ti¹ti², c⁷oa⁴ qui³si³c⁷e¹jna³n⁷ion¹ ya⁴ nca⁴jao⁴ jña³ njion² chon³, sa³nta³ nca³ s⁷e⁴nta³jin³-le⁴. 5 Ni³na¹ li²coi³ qui³si³cha³t⁷a³-le⁴ son³nte³jchi¹nca³, to⁴nca³qui³si³ca³sen¹jtsi¹n⁷ion¹ xi³ tsa³nca³son² son³nte³-le⁴ cho⁴ta⁴ts⁷en⁴. Qui³si³c⁷e¹yo³con³ to⁴je² Noé xi³ qui³nchja⁴ya³ xi³ cjoa⁴qui²xi⁴, cao⁴ nqui² ña³to³ cho⁴ta⁴. 6 Ni³na¹

qui³si³cja³a¹ cjoa⁴ñ⁷ain³ je² na⁴xi⁴na³nta¹ Sodoma
 cao⁴ Gomorra nca³ qui³si³qui³xo²ya³. To⁴chao³l¹i¹
 tsa³qui³ncha¹ne². C⁷oa⁴-s⁷in² tsa³ca³co¹cho⁴ya³-le⁴
 je² xi³tsa³ca³tio²-sa³, xi³tsi²tsa²ve³xcon¹Ni³na¹, je²
 cjoa⁴ñ⁷ain³xi³cjoa⁴ai¹-le⁴. 7 C⁷oa⁴tsa³c⁷a³sje³ntjai²
 Lot xi³cho⁴ta⁴cjoa⁴qui²xi⁴, xi³si³coan³-le⁴
 to⁴t⁷a³ts⁷e⁴ cho⁴ta⁴ts⁷en⁴ xi³to⁴cjoa⁴chi⁴nca⁴
 qui³tjen⁴nqui³-le⁴. 8 (Je² cho⁴ta⁴cjoa⁴qui²xi⁴-ve⁴
 tsa³c⁷e²jna³jin³-le⁴ cho⁴ta⁴ts⁷en⁴-ve⁴. Tsa³ve³c⁷oa⁴
 qui³nch⁷oe¹xi³c⁷oa⁴qui³s⁷in³je²xi³to⁴cjoa⁴ts⁷en⁴
 tjin¹-le⁴. Nchaon³nchaon³aon³coan³-le⁴nca³
 nta³tjin¹ni⁴ma⁴-le⁴je²cho⁴ta⁴cjoa⁴qui²xi⁴-
 ve⁴.) 9 C⁷ia⁴ni⁴čhjin³nca³fa³a¹cjoa⁴ñ⁷ain³,
 je²Nai³-na¹ma³-le⁴v⁷a³sje³ntjai²cho⁴ta⁴xi³
 ve³xcon¹nca³je². Ma³-le⁴si¹c⁷e¹jna³tjao²je²
 xi³tsin²-le⁴cjoa⁴qui²xi⁴-jin², sa³nta³ni⁴čhjin³
 nca³s⁷e⁴nta³jin³-le⁴, jme¹-ni³nca³c⁷oa⁴-s⁷in²
 s⁷e⁴jna³ne²-ni³le⁴cjoa⁴ñ⁷ain³. 10 Xi³ti¹tjon²,je²-
 ve⁴xi³fi²tjen⁴nqui³-le⁴cjoa⁴chi⁴nca⁴-le⁴yao³-le⁴,
 xi³to⁴ya⁴2tjio¹ma³jin³cjoa⁴ch⁷ao³cjoa⁴jnti¹-le⁴,
 xi³to⁴cjoa⁴sca¹ve³con³cjoa⁴te¹xo³ma³, xi³n⁷ion¹
 xi¹jin³, cho⁴ta⁴ts⁷a³ntjai²cjoa⁴, li²coi³tsa³cjon¹nca³
 nchja⁴aon³-le⁴xi³nc⁷a³tjio¹. 11 Ti⁴je²-ni³a²ncje⁴,
 nta³tsa²nqui²sa⁴tjin¹-le⁴nca³n⁷ion¹cao⁴-ni³je²,
 nta³tsa²nqui²sa⁴ti¹tjon²tjio¹ma³cao⁴-ni³je²,li²coi³
 fi²co²ntran⁴-le⁴,li²coi³nchja⁴aon³-le⁴nqui³xcon⁴
 Nai³-na¹. 12 Jo³-ni³tsa²cho⁴xi³li²coi³nch⁷oe¹,
 xi³to⁴xa¹c⁷oa⁴cjoan³-ni³xi³to⁴xa¹qui³tsin³-
 ni³nca³coi⁴nto⁴va⁴nca³si⁴c⁷en³,je²cho⁴ta⁴-vi⁴
 nchja⁴ch⁷ao³-le⁴cjoa⁴xi³tsi²tsa²ma³cho⁴ya³-le⁴,
 to⁴jnco³cao⁴je²coi⁴ya²-ni¹cha⁴jin³-ni¹. 13 C⁷oa⁴-

s²in² tjoē¹-le⁴ chji¹-le⁴ nca³ tsin²-le⁴ cjoa⁴qui²xi⁴-jin². C²oa⁴-s²in² tsjoa³ ma³-le⁴, si¹ñna³con³ yao³-le⁴ nta³ tsa² ni⁴čhjin³. Je² cho⁴ta⁴-ve⁴ jnti¹, tsen³ ch²ao³ cjoan³. Tjin¹-le⁴ cjoa⁴tsjoa³ nca³ v²a³na⁴cha⁴ c²ia⁴ nca³ tjo¹cjen²cao⁴-no³. ¹⁴ Tjin¹nqui³ntsjai² xcon⁴ cjoa⁴cha³jnqui³. Li²coi³ ma³-le⁴ tsjion¹ je¹-ve⁴. Si¹nt²e¹t²a³-le⁴ je¹ je² cho⁴ta⁴ xi³ to⁴i⁴ to⁴jan¹ si¹cja³ai³tsjen³. Je³c²oa⁴-s²in² coan³nca³-le⁴ ni⁴ma⁴-le⁴ cjoa⁴ch²ao³ntai³. ¹⁵ nti¹-le⁴ cjoa⁴taon³ ni¹. Qui³si³c²e¹jna³ ntia⁴qui²xi⁴, xin² qui³-le⁴, nca³ qui³tjen⁴nqui³-le⁴ ntia⁴-le⁴ Balaam, ¹⁶ nti¹-le⁴ Beor, je² xi³ coan³tsjoa³que³ xi³ cao⁴ cjoa⁴ts²en⁴ qui³njen³. Qui³no²cjoa⁴ti³cao⁴ xi³ t²a³ts²e⁴ cjoa⁴ts²en⁴-le⁴. Jnco³ cho⁴ch²a¹ xi³ tsi² ma³-le⁴ en¹, qui³nchja⁴ jo³-ni³ tsa² cho⁴ta⁴x²in⁴, tsa³c²e¹chjoa²a³ cjoa⁴sca¹-le⁴ je² Balaam xi³ qui³nchja⁴ya³ xi³ t²a³ts²e⁴ Ni³na¹. ¹⁷ Je² cho⁴ta⁴-vi⁴ jo³-ni³ tsa² nca⁴jao⁴ na³nta¹ xi³ tsin²-le⁴ na³nta¹, jo³-ni³ tsa² yo³jvi³xa⁴ xi³ fi²cao⁴ xquin¹. Xi³ t²a³ts²e⁴ je² cho⁴ta⁴ ti¹jna³tja²-le⁴ cjoa⁴njion² ya⁴jin³ njion²n²ion¹-ve⁴ nca³ntsjai² ni⁴čhjin³. ¹⁸ C²ia⁴ nca³ nchja⁴ en¹nc²a³ xi³ tsi²jme³ chji¹-le⁴, cao⁴ cjoa⁴chi⁴nca⁴-le⁴ yao³-le⁴ si¹nt²e¹t²a³-le⁴ je¹ je² cho⁴ta⁴ xi³ cjoa⁴qui²xi⁴ ji³tjo³xin²-le⁴ xi³ tsi² nta³ tjo¹ma³. ¹⁹ Si¹s²e³nqui³-le⁴ nca³ to⁴sca⁴ni²nta¹, to⁴nca³ je² cjoa⁴chi⁴nca⁴-le⁴ va³te¹xo³ma³ntsjai²-le⁴. Je² xi³ qui³ni²qui³njen³-le⁴, na³nqui³ ti¹jna³-le⁴, jo³-ni³ cho⁴nta³ ma³-le⁴ je² xi³ qui³si³qui³njen³-le⁴. ²⁰ Cjoa⁴qui²xi⁴ ni¹, tsa² je² xi³ c²oa⁴-s²in² tsa³qui³ncha³xin²t²a³-le⁴ je² cjoa⁴ch²ao³cjoa⁴jnti¹-ve⁴ xi³ tjin¹ i⁴ son³nte³, nca³ je³tsa³ve³ Nai³-na¹ xi³ tsa³c²a³sje³ntjai²-na¹, je²

Jesucristo, tsa² nqui²jnco³c⁷a² tjio¹si¹c⁷o¹jin³ yao³-le⁴ cjoa⁴ch⁷ao³cjoa⁴jnti¹-ve⁴, je³qui³ni²qui³njen³-le⁴. To⁴nqui²sa⁴ ch⁷ao³s⁷in² tjio¹ xi³ fe³t⁷a³-ni³ cao⁴-ni³ nca³ to²ts⁷in³-le⁴ cjoa⁴. **21** To⁴nqui²sa⁴ nta³-ni³ tsa²ca³-ni³, tsa² tsi² tsa² tsa³ve³ ntia⁴² xi³ cjoa⁴qui²xi⁴, cao⁴-ni³ tsa² scan³-ni³ nca³ tsa³ve³, qui³si³c⁷o¹fa³ya³-ni³le⁴ cjoa⁴te¹xo³ma³ xi³ tsje³, xi³ tsa³c⁷ai²-le⁴. **22** N³a³qui³ c⁷oa⁴-s⁷in² cji³ma³-le⁴ jo³ tso² en¹ xo⁴ tso²: Je² nia¹ qui³squi³ne³ nqui²ntia³ nta¹vi³so³-le⁴, c⁷oa⁴ je² chi⁴nca⁴ xi³ je³tsa³ca³nco¹ya³ nqui²ntia³ tsa³ca³nco¹ya³ ya⁴jin³ nta¹si³.

3

Je² Nai³-na¹ qui³tsjоa³ ts⁷oa³ nca³ cjoa⁴?ai¹

1 Jon² xi³ tjao²que⁴-no³, ti²cji³-no³ nt⁷ai⁴-vi⁴ xi³ ma³jao²-ni³ xon⁴. Nca³ jao² xon⁴-ve⁴ v⁷e³ne²³-no³ jme¹-ni³ nca³ si³cja³?a¹-si¹ni³le⁴ cjoa⁴fa³?ai³tsjen³-no³ xi³ tsje³, **2** jme¹-ni³ nca³ cjoa⁴?ai¹tsjen³-si¹ni³no³ je² en¹ xi³ co²tse³ tsa³ca¹ya³con³ je² cho⁴ta⁴ xi³ tsje³ tsa³ca³tio², xi³ qui³nchja⁴ya³ t⁷a³ts⁷e⁴ Ni³na¹, c⁷oa⁴ nca³ cjoa⁴?ai¹tsjen³-si¹ni³no³ je³ cjoa⁴te¹xo³ma³-le⁴ Nai³-na¹ xi³ tsa³c⁷a³sje³ntjai²-na¹, xi³ qui³ts⁷ai²-no³ to⁴t⁷a³ts⁷e⁴ pa²stro⁴-no³. **3** Ti¹tjon² ma³chjen¹ nca³ ca²ta³?yao³ je²-vi⁴, nca³ je² ni⁴čhjin³ xi³ cjoet⁴?a³ cjoa⁴?ai¹ xi³ tsjоa³-le⁴ vi³jno²que³, xi³ ti⁴ts⁷e⁴-ni³ cjoa⁴chi⁴nca⁴-le⁴ c⁷oe¹ma³jin³. **4** C⁷oi⁴coi⁴tso⁴: J³na¹ ti¹jna³ ntai⁴ xi³ qui³tsjоa³ ts⁷oa³ nca³ cjoa⁴?ai¹. Jo³ sa³?nta³ nca³ c⁷en³ xi³jcha¹-na¹, to⁴jo³ c⁷oa⁴-s⁷in² chon³ jo³ sa³?nta³ nca³ qui³s⁷e³nta³ son³?nte³. **5** Cjoa⁴qui²xi⁴ cai³-le⁴ scoe⁴ cho⁴ta⁴ nca³ cao⁴ je² en¹-le⁴ Ni³na¹ qui³s⁷e³nta³-ni³ nc⁷a³jmi³ ni⁴čhjin³ co²tse³,

c²oa⁴ je² na³nqui³ xi³ ji³tjo³xin²-le⁴ na³nta¹-ve⁴, xi³ v²ai²nca³n²ion¹-le⁴ cao⁴ na³nta¹. ⁶ Cao⁴ na³nta¹-ve⁴ qui³cha³ je² son³nte³ xi³ qui³s²e³ c²ia⁴ ni⁴čhjin³-ve⁴ nca³ tsa³nca³son² na³nta¹. ⁷ Ti⁴je²-ni³ en¹-le⁴ Ni³na¹ ti¹v²e¹tjao² je² nc²a³jmi³ cao⁴ son³nte³ xi³ tjin¹ nt²ai⁴, jme¹-ni³ nca³ coi⁴ti⁴-si¹ni³ coi³ ni⁴čhjin³ nca³ s²e⁴nta³jin³-le⁴ cjoa⁴, nca³ cha⁴ cho⁴ta⁴ xi³ tsi² ve³xcon¹ Ni³na¹. ⁸ To⁴nca³ jon² xi³ tsjoa³que⁴-no³, a³li² ni²cha³jin³-jion²³ cjoa⁴-vi⁴, nca³ jnco³ ni⁴čhjin³ jnco³ jmi³ no¹ ma³-le⁴ Nai³-na¹, c²oa⁴ jnco³ jmi³ no¹ jnco³ ni⁴čhjin³ ma³-le⁴ Nai³-na¹. ⁹ Je² Nai³-na¹ li²coi³ si⁴ts²ya² xi³ qui³s²e³nqui³, jo³-s²in² si¹cja³ai³tsjen³ c²a³ nca³ ma³tse³ya²-le⁴, to⁴nca³ tjin¹-le⁴ cjoa⁴tse³jta³ xi³ t²a³tsan⁴². Cai³-le⁴ nca³ jnco³ xi³ cha⁴. To⁴me³-le⁴ nca³ cjo⁴cho² si¹c²a³ntjai²ya³ cjoa⁴fa³ai³tsjen³-le⁴ nca³ts²i³. ¹⁰ Je² ni⁴čhjin³-le⁴ Nai³-na¹ cjoa⁴ai¹ jo³-ni³ tsa² che¹ nca³nzion². C²ia⁴ je² nc²a³jmi³ coi⁴xo⁴ya³, jo³ n²ion¹ cjoa⁴ne³ya³. Je² nca³yi³je³ xi³ si¹i³sen³ nc²a³jmi³ coi⁴ti⁴, cha⁴. Je² son³nte³ cao⁴ je² tso³jmi² xi³ i⁴ tjin¹ coi⁴ti⁴. ¹¹ Tsa² nca³yi³je³ cjoa⁴-vi⁴ coi⁴xo⁴ya³-ni¹, jo¹-s²in² ma³nquin¹cao⁴³ yao³-no³ xi³ t²a³ts²e⁴ cjoa⁴ xi³ tsje³, c²oa⁴ jo¹-s²in² ²ya³xcon¹³ Ni³na¹. ¹² Je³ti³cho³ya²cao⁴³ yao³-no³, n²ion¹ me³ta³con²³ nca³ cjoa⁴ai¹ ni⁴čhjin³-le⁴ Ni³na¹. C²ia⁴ ni⁴čhjin³ coi⁴ti⁴ coi⁴xo⁴ya³ nc²a³jmi³. C²oa⁴ je² nca³yi³je³ xi³ si¹i³sen³ nc²a³jmi³ coan⁴ na³nta¹-ni³ cao⁴ l²i¹. ¹³ To⁴nca³ ti³cho³ya²-le⁴² nc²a³jmi³ cho⁴tse⁴ cao⁴ son³nte³ cho⁴tse⁴, jñna³ nca³ ti¹jna³ntsjai² xi³ cjoa⁴qui²xi⁴, jo³-s²in² nca³ qui³tsjoa³ ts²oa³ Ni³na¹. ¹⁴ Coi³ cjoa⁴ nca³ ti³cho³ya²-lao⁴³ je² cjoa⁴-

vi⁴, jon² xi³ tsjoa³que⁴-no³, ti⁴xi¹ti¹ya³-lao⁴ yao³-no³
 nca³ nta³ coan⁴nquin¹cao⁴ yao³-no³, jme¹-ni³
 nca³ coan⁴sjai³-si¹ni³no³ nqui³xcon⁴ Jesucristo,
 nca³ tsi² jme³ cjoa⁴jnti¹ tsi² jme³ je¹ s²e⁴-no³,
 c²oa⁴ nca³ nch²an¹ coi⁴yo³. **15** Cjoa⁴vi³tjo³ntjai²
 ca²ta³ma³-no³ je² cjoa⁴tse³jta³-le⁴ Nai³-na¹. C²oa⁴-
 ti⁴s²in² qui³squi³-no³ nts²e³ Pablo xi³ tja²cha³,
 jo³-s²in² tsa³c²ai²-le⁴ cjoa⁴i³sen³ta³con². **16** C²oa⁴-
 s²in² nca³yi³je³ xon⁴-le⁴ qui³squi³t²a³ je² cjoa⁴-vi⁴.
 Tjio¹jin³ c²a³ cjoa⁴ xi³ cjai¹nca³ ñ²ain³ ma³cho⁴ya³-
 na¹. Je² cho⁴ta⁴ xi³ tsi² tsa² ma³cho⁴ya³-le⁴, xi³
 to⁴i⁴ to⁴jan¹ si¹cja³-²ai³tsjen³, si¹c²a³ntjai²ya³ coi³
 cjoa⁴-vi⁴. C²oa⁴-s²in² si¹cao⁴ xi³ cja⁴ai¹ xon⁴
 Escrituras. Coi³ cjoa⁴ va³quin²-sa³le⁴ nca³ cha⁴.
17 Jon² xi³ tsjoa³que⁴-no³, nca⁴je³qui³ni²qui³nch²oe¹-
 no³, ti⁴coi²ntao⁴ yao³-no³, jme¹-ni³ nca³ tsi² tsa²
 c²oa⁴-ti⁴ jon² xin² ntia⁴ coan⁴nquin¹-si¹ni³, nca³
 c²oa⁴na⁴cha⁴-no³ je² cho⁴ta⁴ xi³ ch²ao³ cjoan³,
 c²oa⁴ jme¹-ni³ nca³ tsi² tsa² tsao⁴jen³nqui³-si¹ni³
 nca³n²ion¹-no³. **18** Ca²ta³ma³jcha¹jin³-no³ cjoa⁴nta³-
 le⁴ c²oa⁴ cjoa⁴fa³-ai³tsjen³-le⁴ Nai³-na¹ Jesucristo xi³
 tsa³c²a³sje³ntjai²-na¹. Je² ca²ta³vi³tjo³je³ya³ nt²ai⁴-vi⁴,
 c²oa⁴ sa³nta³ nca³ ni⁴chjin³ xi³ tsi² cjoet²a³. C²oa⁴
 ca²ta³ma³.

**Xon⁴-le⁴ ni³na¹ xi³ t?a³ts?e⁴ Jesucristo
New Testament in Mazatec, Huautla
(MX:mau:Mazatec, Huautla)**

copyright © 1960 Wycliffe Bible Translators, Inc.

Language: Mazatec, Huautla

Translation by: Wycliffe Bible Translators, Inc.

Mazateco, Huautla [mau], Mexico

Copyright Information

© 1960, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Huautla

© 1960, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

69c7ee6e-d3c3-563f-a672-6ad58122d8ed